

Wann zu Enn gejt es Johr...

Hanne Assion-Bausback

Im Advent, wann's scho noh uff Weihnachde gejd,
un der Moond sou kaald am Hiemel schtejt,
küntt's will Heer durch die Lüft' gebrast,
Mit Göil un Reider un Hundsgegauz,
un rüddelt vorn un hinne am Hausch,
daß die Großmudder sejcht: loßt sie doch naus!
Dann braust des durch de dunkle Gang
mit Höile un Pöife an der Wenn entlang.
Die Schlotheksch fiehrt zum Kamie owwe naus,
daß die Funke flieche zum Schürlooch raus.
Un die Großmudder verzejlt am Oufe gar,
wie eener zu derre Zeid no uffem Acker war:
es will Heer hot'en dort zu Boode g'schlaache
un sa Schoorn durch die Lüfte fortgetraache.
De Kinn lääft's eischkaald de Buckel nuuf,
awwer sie sitze doch noo un spörre ihr Göschli uff
un hörn vun de Meerfräali daus vom Morschbrunne,
wu ooweds kumme sen un häwwe helfe g'schpunne,
im Grünwaldshausch, sou manchi Naacht,
bis die Borsch häwwe en böische Schawwernack g'maacht.
Die Uhr war um e ganzi Schtunn verstellt,
un domit war ihr Urteil g'fällt:
vun dem Daach oo sen se nimmi kumme
un warn for alli Zeide verschwunne.
No höit hört mer do daus im Wind ihr Klaache,
awwer des norr an besonderi Daache.

☆

Die Ärwet is g'schafft, zu Enn gejt es Johr,
die Zwölf Heiliche Nächst sctenn korz bevor.
'S is endli mool Ruh in Houf un Hausch,
un mer kroomt widder die aalde G'schichte aus.
Mer sitzt nozamme, sücht die Oufewörm,
sogar die Mannslöit halde sich net lang in der Schöjern.
Der Vadder hot früh scho de Schtaal fördi g'maacht

un meent: „es schmackt noch Schneej höit Naacht“.
'S is früh scho dunkel un uuheemli daus,
wer do net muß, gejt nimmi naus.
Im Amthauschgaarde, do ächze die Bööm.
Es hört sich graad oo, wie wann eener schtöhnt.
Dann dut die Doode gern verzejle,
daß jetzt unnerwegs wärn die arme Seele.
Sie mejcht e Kröiz un meent dezu:
„jaa, e manichs find' no net sei Ruh“.
Do het eener Holz g'maacht daus em Waald,
un es war sell Johr sou arich kaald,
und do wär's scho sou halwer duscheli gwee-e,
un do het'er im Neebel een ümgejne g'sähe.
Er het sich g'föcht, er war ganz ellee,
denn des war der Schütz mi'm eene Bee!
Dann brennt sie mehr wie sunscht unnerm Johr
ooweds ihrn g'weihde Wakschstock oo.
Un die Kinn gucke heemli die Schtrooße nab,
ob net 's weiß' Göile künnt im Trapp,
wu mancher in der Voorscht scho hot schpringe sähe
der schpeed no unnerwegs is gwee-e.

☆

Die Zeid ist die geheimnisvollsch im Johr.
Was mer doo treemt, werd im annern Johr wohr.
Am Eenezwanzichschte, die Thomasnaacht,
hot de Määdli viel Kopfzerbreche g'maacht.
Wer wääß no den aalde Schpruch zum Beede,
un daß mer a muß de Bettstolle treede?
Im Troom erscheint dem Määdle dann
sicher der zukünfdi Ehemann.
Zwölf Zwüwwelschaale füllt mer mit Saalz in denne Nächst,
weil mer's Weeder im nöje Johr gern wüsse möcht.
Der Bauer gückt es gezoogene Wasser oo
un wääß, wie er is mi'm Weeder droo.
Um Gott's Wille derf mer a net vergesse,
daß in de Zwölf Heiliche Nächst werd nimmi g'wäsche,
denn wann do no Wäsch hankt daus,
träicht mer im nöje Johr eens naus.
Sogar im Schpeicher derf keeni mej hanke,
sunscht het die Mudder ke Ruh in Gedanke.
Des hot scho die Großmudder sou g'halde,
dröm will sie denn aalde Brauch erhalde.
Es get manchi, die mache des höit no sou,
doch die Junge glaawe jo nimmi droo.

☆

Radio un Fernsähe häwwe früher halt no g'fehlt,
desweeche häwwe sich die Löit G'schichde verzejlt,
sen nozamme g'sesse amool im Nochbershausch,
es Klenscht no hot g'luurt wie e Hechelmausch,
un häwwe sich sou die Zeid vertrieuwe,
un e manichs is no in Erinnerung gebliewe.
Ich meen halt, es wär höit nimmi sou richdi Advent,
weil vier Wuche vor Weihnachde scho der Chrischboom
brennt.

Geche früher: die aald Gasfunzel am Ploo!
Wann dort dann am Chrischtoowed der Boom hot gebrennt,
's war alles sou schtill, un 's is niemed mej g'rennt,
un wann's dann no sou leis hot oog'fangt un g'schnöit,
nocht hot mer sich örscht richdi uff Weihnachde g'freut!